

COMUNICATO n. 3374 del 30/11/2024

Traduzione in ladino

“Pedies”: l é fora la puntata #462 del program ladin per la televizion

Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata 462.

I argomenc de chesta setemèna l é: la Gran Radunanza de la Majon di Fascegn, n moment per portèr dant la ativitèdes del Istitut, del Museo e de la Biblioteca ladina, ma ence n moment de confront e de barat de idees. Endèna la scontrèda l é stat anunzià ence l 50^a cedeana de la Majon di Fascegn, che la é do a se endrezèr per fèr festa per chest gran travert tel 2025; i Conscric l é na tradizion n muie sentuda dai joegn che fèsc i 18 egn. Per chest l’Union di Ladins de Fascia, tel chèder di projec del Pian di Joegn de Raion – La Risola, l’à metù a jir n cors gustegol per ge insegnèr ai tousc apede ai 18 egn co se endrezèr l gramièl e l ciapel da Conscrit; per la rubrica “Lesc: cuchèr te ogne piz e cianton”; Ve porton ta Penìa, ultim paisc de la Val, logà su na barconèda de preerc, tedant da la crepes de la Marmolèda. N paisc n mingol foravia, con n muie de curiositèdes artistiches, storiches e culturèles.

Amò apede recordon che en lunesc ai 9 de dezember del 2024 da mesa les nef da sera te Ciasa de la Moniaria a Sèn Jan vegn portà dant l codejel “ENTENER E SE FÈR ENTENER: JIR A PROVIDER, COJINÈR E MAGNÈR A NA VIDA ECOSOSTEGNIBOLA E SÈNA”, scrit da Doris Valentini. Per la prejentazion vegn endrezà doi corsc de cojina col chech Andrea Zanonèr aló dal Hotel l’Ideale a Moena, en mercol ai 11 e en lunesc ai 16 de dezember. Per informazions se oujer al Ofize di Servijes linguistics e culturèi del Comun General de Fascia a la direzion mail cultura@cgf.tn.it.

I servijes de chesta setemèna, enjigné da Angela Pederiva e Riccardo Zanonèr, i vegn porté dant da la ousc de Sabrina Riz.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol.

“Pedies” l va fora su Trentino Tv vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

Se pel veder i servijes un a un su la piata Facebook de TV Ladina:

<https://www.facebook.com/TelevizionLadina>

Traduzion di Servijes Linguistics e Culturèi del Comun general de Fascia

(cdt)